

卷八

書名 豐順縣志八卷首一卷 同治四年重補刊本
 撰者 清 葛曙等 纂
 卷 卷八
 內容分類 史-地理-今地志-廣東
 索書號 史部-地理-都郡-247.01
 編號 B2692100

豐順縣志卷之一

知豐順縣事禹航葛曙生洲父纂

疆

野

沿革

疆域

城垣

附關隘

都圖

附墟市坊表

川 附津梁

王體國經野畫井分疆俾守土者觀天文以察變

地利以制宜設險捍禦以固圉懋遷化居以粒民

一邑胥是道也豐固巖邑僻介萬山明季素稱

[彩色首頁1](#)

[東洋文化研究所漢籍目錄 編號: B2692100](#)

[東洋文化研究所漢籍目錄所藏漢籍善本全文影像資料庫 索書號: 史部-地理-都郡-247.01](#)

[漢籍善本全文影像資料庫文本 豐順縣志八卷首一卷 同治四年重補刊本](#)

[版權所有: 東京大學 東洋文化研究所](#)

[使用上的注意事項](#)

數我

豐順縣志

卷之一 疆輿

一

0 1 2 3 4 5 6 7 8 9 10

豐順縣志

豐順縣志

豐順縣志卷之八

知豐順縣事禹航葛曙生洲父慕

藝文志

文詩

古太師陳詩以觀民風志有藝文卽採風遺意固一
邑之人情土俗時事物變所由傳也前明羅銓部有
才名於時今存瞻六堂詩而諸作絕少則邑先達之
著作散佚不傳概可想見少師吳順恪以武功顯讀
其忠孝堂集招撫等篇忼爽直切深達事機惜此外

之不多觀也邑屬山巖奇峭林谷深阻幽泉怪石不可殫悉設移之都會其發爲文章者當不止此然而單詞片語採風者勿棄錄之以備後覽焉作藝文志

文

勅建加贈少師兼太子太師廣東饒下總兵官左都督謚順恪吳六奇碑文

稽古建業驅策羣力不吝爵賞以勸有功昭示後世用傳不朽所以勵忠蓋甚備也爾吳六奇識時知命率衆來歸秉義懷忠宣力戎伍至於郝尚久叛踞潮州爾能奮勇勦滅賊寇蒞任巖疆厥有勤勞忽聞長逝甚悼朕懷特賜謚曰順恪勒諸貞珉光及泉壤國典臣誼庶其昭垂母斃哉

豐川集卷之二
康熙伍年玖月初柒日立

御製諭祭吳少師文

維康熙六年七月十四日

皇帝遣廣東布政司堂上官

諭祭故加贈少師兼太子太師廣東饒平總兵官左都督謚順恪吳六奇之靈曰鞠躬盡瘁臣子之芳踪卹死報勤國家之盛典爾吳六奇性行端良才能稱職識時慕化率衆來歸方冀遐齡忽焉奄逝朕甚悼焉特頒祭葬以慰幽魂嗚呼寵錫重壚庶享匪躬之報名垂信史聿昭不朽之榮爾如有知尚其歆享

戮鱷魚文

宋 陳堯佐

乙亥歲予於潮州建昌黎先生祠堂作招韓詞載鱷魚事以旌之後又圖其魚爲之贊凡好事者卽以授之俾天下之人知韓之道不爲妄也明年夏郡之境上地曰萬江村曰硫磺張氏子年始十六與其母濯於江浹倏忽鱷魚尾去其母號之弗能救泊中流則食之無餘予聞而傷之且謂天子聖武王澤昭洽刑不僭賞不濫海內海外罔不率俾昆虫草木裕如也鱷魚何恃焉而肆毒任虐之如是是不可不爲之思也命縣邑李公詔郡吏楊勛拏小舟操巨

網馳往捕之咸謂予曰彼不可捕也穴深淵游駭浪非人力之所能加也予則不然復之曰方今普天率土靡不臣妾山川陰陽之神奉天子威命晦明風雨弗敢逾也鱷魚恃遠與險毒茲物律殺人者死今魚食人也又何如焉昔昌黎文公投之以文則引而避是則鱷之有知也若之何而逐之姑行焉必有主之者矣苟不能及予當請於帝躬與鱷魚決二吏既往卽以予言告之是日乃投網輒止伏不能舉由是左右前後力者凡百夫曳之以出緘其吻城其足檻以巨舟順流而至闔郡聞之悉曰是必妄也安有



人之魚形越數丈而能獲之者焉既見之則駭而喜且曰生於世有百歲者矣凡上下水中或見其隆伏髣髴之狀雖相遠百步尚不敢抗今二吏捕之猶拾芥焉實今古之所未聞也向非公之義洽於民公之令嚴於吏自誠而不欺也又安能殲巨害平大怨宣王者之威刑焉予始慎之終得之又意韓愈逐之於前小子戮之於後不為過也既而鳴鼓召吏告之以罪誅其首而烹之辭曰水之怪則曰惡兮魚之悍則曰鱷兮二者之異不可度兮張氏之子年方弱兮尾而食之胡為虐兮熒熒母氏俾何說兮予實

命吏顏斯作兮害而弗去道將索兮夙夜思之哀民瘼兮
趕赴二吏行思恪兮矯矯巨尾迎而搏兮獲而獻之俾人
樂兮鳴鼓召衆春而斲兮而今而後津其廓兮

瞻六堂詩序

陳際泰

陳子於有韻之言本無所諳然從衆中讀之謬相然贊譬
之陸羽不識字坐石上讀書效人口動而已前序天中石
郎詩亦爲此語石郎大貽笑之以爲陳子之直白如此也
陳子在浮梁舟中晤汪函朗函朗爲汪伯玉大司馬從子
素不習時義而善古文辭得予制舉業大嗟賞予刻怪卿
不習此何以獨賞此然以別友文使之讀則已不解爲何
語矣世之習舉子業者以陳子之文不可句而汪所不解
者乃在彼不在此彼非以時文讀陳子之書以古文讀陳

子之書也由此言之陳子不諳有韻之言至如羅子貞卿之詩則固諳之矣讀之政如讀古人名作古遠澹宕而秀傑之氣往往引人着勝地味之經年未必可盡也然乍接之時一睇而見之洪纖高下雖不習者皆能名其處此爲天材絕優非復一流之材之所可幾者也陳子所不能諳者雖坐不習然亦世人之爲詩有以使之然詩如貞卿而陳子猶貽人云效人口動而已夫非媒而誕陳子亦不爲也貞卿年少制義外凡有雜著皆可名家此詩固已見虎文矣

瞻六堂詩引

吳本泰

於制科帖括之外別出一枝而燈傳無盡者唯詩詩者清微窅渺之氣激越以鳴者也熱場濃趣中焉得有詩以真詩與真能詩人處熱場濃趣中憂憂乎其不相入矣年友正卿妙年早達游刃吏事余十駕弗及而襟情蕭遠頗似之余每見其戟髯抵掌如滕元發扁舟破浪而來軒然聳出至讀其詩如九臯獨唳深林孤芳異香幽響都不着人間澤穢笠澤翁評山谷帖謂不應携在長安逆旅中亦非貴人席帽金絡馬傳呼入省時所觀余於正卿詩亦云



奏陳言疏

國朝 吳六奇

奏為遵

旨陳言事順治拾貳年正月拾玖日欽奉

上諭文官自督撫以下知府以上武官自提督總兵以下副將以上管轄之內職掌事宜俱着詳切直陳無隱以資採用欽此又於順治拾貳年參月初參日欽奉

上諭吏部等衙門凡有敷陳必實切

國家之大政確指兵民之利害方許進奏毋得浮泛雷同妄行瀆奏欽此欽遵伏念臣廣東潮州人也濱海愚弁不敢

言天下事惟就事言事直陳今日海濱戰守之急務實切
國家之大政者如揭陽克復之後臣卽陳善後之策已蒙督
臣李率泰批行不敢復瀆

天聽矣惟是海逆鄭成功未卽一旦撲滅蓋踞海澄廈門銅
山等處爲島窠而以澎湖浯州金門南澳等處爲退步諸
地皆在海中或週圍百里數十里有山有田有人所居者
皆食賊之食官賊之官其黨類滋蔓恃有大船沿海劫掠
上至江南温台下至潮惠高雷等處結艚揚帆去來莫測
爲今之計必於沿海地方凡賊船所到之處各設重兵守

禦以絕賊劫糧之路必於福興漳泉潮揭等處附近賊窠
之所製造船隻招募慣熟水道之人有家眷爲質者使之
操舟戰守旣備賊中之內亂自生然後乘風破浪犁庭掃
穴彼鳥合之賊無不追鯨逐北矣若船取於他州使船非
本地之人則港門水道不熟必悞大事此萬萬不可者且
置船之策不惟今日剿賊急用卽鄭逆撲滅之後尚慮海
賊時時竊發亦必有備乃可無患如先年海賊遠不具述
近如袁八老之後卽有桂竹老又有李魁奇劉香老等寇
爲患不絕彼時沿海遊寨尚有官兵又有瞭哨兵船卽如

南澳先年設副總兵一員內有廣營福營又有防倭一營今爲僞侯陳豹所踞則今日置船招募以圖撲滅復此疆土不可不亟爲綢繆也然造船之見人言所必同者而臣所言置船須得其地用船須得其人乃治海急務萬不可無此人此船者芻蕘之言倘有可採伏乞

皇上勅議施行

招撫南澳題疏

題爲恭報南澳僞鎮率衆投誠兵民棄澳盡歸以仰慰

上懷事竊惟南澳一島原屬廣東潮州饒平境上與閩之廈門銅山久爲鄭逆盤踞窠穴康熙二年五月臣奉

上旨會勦無功兢兢待罪乃多方用心以圖必得至本年十

一月初四日據臣標署守備管中軍遊擊事鄒瑞稟稱本月初二日據署守備管中軍守備事李青稟報有南澳僞鎮杜輝遣長髮差官林星初一夜從馬頭山登岸潛至汛內前來見青稱欲見臣有議大事之舉事干緊急機會當

差林恩護送林星到臣隨喚林星面見繳杜輝上鎮海將軍王國光小劄一摺據稱杜輝願以南澳投誠立功等情時將軍臣王國光安輯部臣華善同

丙差往省西巡臣乃令臣標隨征都司歐亮効用官陳忠林恩帶林星赴見安輯部臣陳一炳鎮海副都統臣吳天壽臣段應舉會議給牌齎與杜輝印信文書於初六日早由黃岡直至南澳面見杜輝仍給牌一張付與歐亮與輯部差官吳必興駕船泊於橫山伺接消息刻限回報去後初九日據歐亮稟稱初八日杜輝又差林星同効用官陳忠

林恩回來口稱欲與臣面會臣書壹封交陳忠等投上亮同輯部差官帶林星見輯部兩副都統及潮州鎮道府館於公議堂會議約十一日前去相會等情臣於十一日會同安輯部臣陳一炳副都統臣吳天壽臣段應舉齊到黃岡俟至十三日據瞭望兵望見南澳有大船五隻前來又據大城所千總張祐馳馬來報稱杜輝親到要與臣相會臣卽時同安輯部臣副都統臣前去途間遇澳差林星稟稱各要單騎不用多人等語臣見杜輝心尚猶豫立撥部劄叅將管大城所守備事吳漢中軍守備李青先上杜輝

之船以安其心杜輝亦帶親隨百餘人登岸至馬頭山時副都統臣吳天壽帶正白旗噶叭叶李章京副都統臣段應舉帶鑲藍旗李代子單騎前去仍撥趙固山大朱甲喇各官帶八旗官兵同臣下中軍遊擊鄒瑞部劄都司僉書李焜隨征戎旗守備張魁蔡鳳陳龍千總朱樑張祐各帶官兵劄營橫山砲臺及在馬頭高山背後防護臣則帶部劄都司僉書曾蘭同安輯部臣陳一炳副都統臣吳大壽臣段應舉筆帖式臣江維祥單騎至馬頭山下相會據杜輝口說鄭錦雖敗銅山尚要整理火船燒紅窆夾板思復金門廈門有牌調輝輝見鄭家之人骨肉自殘願以南澳獻地爲功非有兵馬所逼卽有兵馬輝亦能當一面等語時安輯部臣兩副都統臣諭以利害臣勸之再三乃要臣等給示差官前去南澳張掛立令兵民削髮約十六日繳僞勅印先送家眷過黃岡容輝收拾在後帶兵民棄澳全來又稱官兵有五千大船肆拾隻中船百餘隻民有二十萬何以安插等語至申時彼此起身而回然後吳漢李青俱各回來十四日臣與安輯部臣兩副都統臣卽給示各送袍帽靴帶全差歐亮等齎送前去并監督兵民削髮去

後十八日據歐亮稟稱亮十五夜到澳見杜輝十六日掛
示兵民剃頭立要渡海因十六十七兩日大風難渡今杜
輝先遣長子杜國琛帶僞印關防牌劄并杜輝胞弟與僞
坐營中軍家眷先到黃岡杜輝欲將澳民渡盡然後將家
眷并各將兵丁家口盡上大船欲載往揭陽縣內居住等
情到臣臣即同安輯部臣陳一炳副都統臣吳天壽臣段
應舉江筆帖式趙固山太朱甲喇并八旗官兵同臣下中
軍游擊鄒瑞等各將領齊到橫山劄營其長子杜國琛年
一十四歲同僞叅軍錢青陳珍齎繳僞蕩胡將軍銀印一
顆僞牌劄五十五張當公帳房隨交安輯部臣陳一炳收
訖其子并各家眷臣即備用民夫搬進黃岡城內着千總
朱樸劉勝張祐將各將領房屋及兵房搬空與住此日來
到兵民男婦已有千餘二十一日臣接杜輝手書內稱二
十日將輝家眷及將領兵眷載入揭陽安插其士民眷口
亦令隨船載入黃岡其澳城民房或存或燬乞迅委官料
理等情并與輯部副都統諸臣各書一封是日安輯部臣
即令江筆帖式潮州府知府臣宋徵璧前往揭陽縣預撥
房宇其澳城去留臣就近呈請平藩將軍督提諸臣會議

裁奪去後二十三日據歐亮自南澳回來稟稱亮二十一日奉差同輯部副都統各差官一員蒙交袍帽靴十副齎往南澳要杜輝前來剃髮以便疏

報等因亮遵依前去值狂風大作坐船桅斷舵失艙破入水飄至南澳後汶地方潮水閣淺方得登岸到澳而杜輝已於二十夜開船去揭陽矣等情臣同時面副都統臣吳天壽說據揭陽砲臺水師遊擊李培基報稱杜輝有家眷船四十隻兵船三十隻俱入揭陽港內等情二十九日接潮州府咨呈內稱同筆帖式江親到揭陽撥出房屋五百餘間不足又撥出東南門內二街民房并大頭目衙門四十餘所俱已齊備又知府自捐糧米五百石概家伙等物俟應安插具報在案同日又據歐亮稟稱杜輝于二十八日親帶大小將領到安輯部臣衙門遵

制剃髮訖等情查先渡過偽將楊世燭等二十餘名臣各給袍帽靴帶馬匹各將領家口共一千七百餘口臣撥屋給米安插在黃岡城內居住渡過民間婦女一萬餘口每口臣給米三升五升不等聽其四處居住俱經塘報平藩將軍督提在案其杜輝所帶官兵家口船隻軍器開列造冊

呈送平藩將軍督提輯部諸臣題

報外以二十載踞澳之逆寇大師未曾壓境而杜輝一旦統眾輸誠各携家屬及兵民眷口棄澳盡歸

朝廷之德化仰祈

皇上崇爵鼓勵來人然此乃仰賴

皇上齊天之洪福而平南王臣尚可喜鎮海將軍臣王國光

協鎮將軍臣沈永忠督臣盧崇峻撫臣盧興祖提臣楊遇

明之密諭招徠潮州鎮臣黃應傑安輯部臣華善夙籌方

畧與部臣陳一炳筆帖式臣江維祥宣布

皇仁副都統臣吳天壽臣段應舉單騎不避危險之力也臣

雖竭盡心力派屋撥船給發袍帽靴帶馬匹猪酒糧米不

惜已私以報

朝廷萬一分所當然何敢言功惟臣下標員如隨征都司歐

亮渡海四次捨命涉險如部劄叅將管大城所守備事吳

漢署守備管中軍守備事李青身先虎口如署守備管中

軍遊擊事鄒瑞董統勤勞千總劉勝朱樑張祐部劄都司

僉書李焜曾蘭玉等隨征都司陳利守備張魁蔡鳳陳龍

林馥効用官陳忠林恩等靡不竭力奔馳共圖報効而紓

皇上南顧之憂也緣係恭報南澳偽鎮投誠情形字多逾格
伏乞

睿鑒恩宥施行

再報招撫疏

題爲再報偽鎮率衆投誠仰祈

睿鑒事案照偽將軍鄭夢蛟等率衆投誠業經彙

報外康熙三年二月二十四日有偽前隨征都督僉事陳六
言自銅山駕船一隻前來繳偽關防一顆偽牌一張隨行
兵丁一十九名家眷二十七口康熙三年三月初四日有
偽都督毛興偽副將毛玉陳勝林臯陳好李祐林宗等據
稱三月初一日自銅山與偽伯洪旭黃廷欲送鄭錦去臺
灣一同開船方得駕船五隻帶到兵丁三百五十五名家

眷四百七十七口繳偽耀武將軍方印一顆偽關防六顆
偽牌二十三張前來投誠康熙三年三月十一日有偽將
郭勝蔡福據稱由廈門港駕船一隻帶到兵丁一百五十
一名家眷二十八口繳偽關防二顆偽牌二張前來投誠
康熙三年三月十三日有偽都督張堯天偽將杜進林亮
張東據稱同洪旭黃廷送鄭錦至金門駕船三隻兵丁七
十七名家眷五十八口繳偽關防五顆偽牌十張前來投
誠各等情到臣臣逐一驗明各給袍帽靴帶通共給過緞
袍一十四領布袍二十一領帽三十五頂靴三十五雙計

帶到兵丁眷屬共一千一百八十五名口臣各給食米菜
銀暫行安插解赴鎮海將軍臣王國光安輯部臣華善臣
陳一炳驗明遵

制剃髮通報平藩協鎮將軍督撫提鎮諸臣在案今照銅山
逆賊俱已削髮登岸止有鄭錦洪旭黃廷雖潛遁海外難
逃福建靖藩總督兩臣之勝算銅山逆城現福建靖藩總
督兩臣親統大師進勦平燬全海無寇臣汎守邊海招引
投誠實叨福建靖藩總督搗窠之功廣東平藩將軍督撫
提督輯部副都統鎮道府館縣諸臣德威之力也緣照自

康熙二年十一月南澳僞鎮杜輝吳陞投誠起至康熙三年三月僞鎮張堯天等投誠止前後總計招過僞將軍僞鎮將共一百八十七員兵丁四千三百五十四名眷屬三千六百九十二口渡過百姓男婦三萬餘口駕來大小戰船九十七隻臣逐一驗明造冊繳赴鎮海將軍臣王國光安輯部臣華善臣陳一炳查照存案外至於應請各僞鎮僞將職銜鼓勵優異之

及編氓安插歸農與調撥入伍充兵之例平藩將軍督撫提督輯部諸臣自在公

疏無容臣贅也臣前後給過袍帽靴馬食米菜銀少稱臣分罔敢開報惟是臣之標下前

疏開列有名將領始終竭勞不敢少怠至饒平知縣劉鴻業捐米五百石協心料理提督臣差隨征守備厲逢祥能與投誠官兵周旋安慰宣布當事諸臣愛待之心功實不少自此海不揚波邊烽無警誠我

皇上一統無疆之福萬年有道之長也緣係再報投誠事理爲此具本專差齎捧謹題



題請別調疏

題為海疆奏平饒鎮應裁披陳愚悃仰乞

睿鑒事竊臣粵之潮人也為因海寇披猖屢犯潮疆
先帝鑒臣微勞愚忠

賜臣勅印

特命鎮守潮之饒平地方以備勦禦臣受事至今拾有壹載
鞠躬盡瘁罔敢有遺餘力茲海上逆寇如廈門銅山浯嶼
等處皆一切犁掃而南澳全島業已來歸卽碣石蘇利背
恩抗

命自干

天討亦以伏誅瀕海之地靡不蕩平內安外攘永紓

朝廷南顧則饒平加設之鎮應可議裁者况臣乃潮人不可
久守潮土向因邊疆未靖所欲言而不敢言者今幸地方
無事可以披陳愚悃以仰

天眷臣之任內叨蒙

皇恩加臣三次官銜兩次賞賚策授招撫又蒙記功紀錄受
恩最深圖報宜切以臣有餘之力當報罔極之

恩伏乞

皇上將臣調任別省饒平地方併歸潮鎮使人地得當經制
有定

朝廷官人之典歸於畫一可爲天下後世鑒法成憲臣復得

竭犬馬之力馳驅於外以盡捐糜報

國之忱也爲此具本專差守備蔡鳳親齎謹題

招周黃洪三鎮書

閩海諸公雄居島上以懷舊主之恩而守不臣之節其矢志孤忠不佞仰之久矣矧以麾下之英風高誼而不厘一方彼美之思者每悵邊疆遙隔聲氣未通且以向者同舟將士尚爾一心志在擊楫言不投機故未敢致尺一於麾下也茲者麾下共事之人內而家庭骨肉外稱干城腹心者皆已次第來歸身膺

清朝爵祿之榮將棄帥主如孤注矣况廈門金門既已失守南澳鎮將復統衆歸潮此亦苦海無邊回頭是岸之一日

也乃麾下之意尚猶遲疑未能自決者或以舟師不忍遽離閩土非所樂居則東粵十州善地惟在所擇若惠然肯來山河帶礪固無疆惟休也粵之藩督將軍麾不引領以待麾下豈特我二三同事之翹企已哉去就之機惟麾下早自裁決焉

招杜吳二鎮書

今日四海一家向背之勢不待明者而後決乃二三豪傑尚猶依戀島上徘徊觀望者不過因前諸重鎮未忍舍舟登陸遲疑未決耳茲者鷺門鄭黃周陳諸親翁已決計來歸鄭親翁此月初八躬率舟師進入泉港紂 藩督諸上臺十五抵泉十八薙髮不佞探報已確此正豪傑乘時各就功名之會也况鷺門諸親翁投誠於閩爵土固自有限恐未得人人而尊顯之若我粵當事日虛祿位以待且不靳以五鼎請之於

朝如忠勇侯陳親翁已膺

寵命繼此非兩台臺其誰也况日者將軍提督正爲南澳之役而來旦暮可抵界上兩台臺若憚然改圖惠然至止則將軍提督之欣然起敬尤爲百倍安有不極力汲引與藩督會題以遂台臺之大願者此中終始之事皆不佞一力擔承決無誤萬勿復再徘徊坐失事機以負不佞披瀝相告之誠是所望也倘荷慨諾卽惠好音併遣的人過我定議臨楮翹企不盡

招周提督書


初六日敝標回來述親翁之意初七日接貴員及台函知親翁心無不誠慮無不周矣及讀至昂藏自許天下事不做則已做則必以誠心許人纖毫無僞云云是以弟更爲親翁進焉兩國相爭求其必得而後甘心兩人相好必得其合而後遂意此一時之人情亦千古之確理也親翁今日許人者功名事業不在胸中惟許人以相見未免憂慮不前在親翁旗鼓相當之後不得不慮然弟居間知

朝廷德意當事真心決無失信之理又爲親翁不必慮者在

此一見已見之後地方由我功名由我有不由我者有弟居閒之人在焉但相見之難難在於疑今弟願以二子爲質又願標員護子爲質親翁慷慨親身登岸盛甲官兵或千或百旗鼓執事擁道前列漢官威儀直走府城見當事者先明忠義而後改頭換面則昂藏丈夫之所爲豈不異乎人之所爲乎貴標統鎮將俱在船惟親翁一人偕弟同往而弟二子在焉又有爲質釋疑之心此行光明正大理直氣壯在乎受降如受敵者亦見親翁經權常變威武不能屈也已見之後然後論地方功名之事豈出前人之右乎前差恐未盡悉今再加差做員謝輝亮齊來共達我意稍有背心大神共譴倘允弟言仰祈賜覆

上藩督將軍揭

為乞採末議題留道官以固海邦鎖鑰事切照潮州巡道
 一官為邊海封疆所繫最重凡地方之吏治民風寇賊奸
 宄以及衙蠹豪橫悉賴振綱肅紀執法彈壓以內鞏金湯
 而外靖山海蓋緣督撫憲臺越在廣肇去潮不啻千里即
 惠州守道亦千里而遙雖節制之權無遠弗屆而封疆緩
 急請命維艱非得風憲衙門駐茲海國上以奉宣憲令下
 以懾服人心則封疆不無叵測之虞此自古以來因地設
 官至意也茲職閱邸報見嶺東巡道一員及南韶羅定嶺



西海北共五道概在議裁奉有

勅下督撫確議歸併之

旨竊謂他道皆在內地潮道獨在邊陲似應分別議留者職
身在地方爲地方起見不能默默故敢僭陳末議仰祈憲
臺俯察蒞蕘倘屬可採伏乞 題留俾海邦重地得固鎖
鑰 社稷生靈益永賴無疆矣

祭羅吏部夫人文

維坤儀之嶽降兮粹質娟娟珠潤榕水兮玉種藍田挺金
枝于名苑兮輝寶婺于星躔美媿河洲之淑兮蘭儀肅穆
芳傳閨閣之秀兮蕙問昭宣嬪姻翁而作配兮相夫子以
惟虔方髫年而桂折兮甫弱冠而臚傳名高斗北兮身近
日邊文貴京洛之紙兮政握天官之銓賴幽贊于閩內兮
斯升華于帝前乃滄桑之忽變兮棄軒冕以逃禪翁旣蘿
衣而薜帶兮漱流枕石靈亦耽蔬而絕綺兮燕處翛然看
佳允之六翮兮將高翔于九天喜蘭玉之濟濟兮復瓜瓞

之綿綿邇家慶之駢集兮由母德之獨賢既歌蘋藻鷄鳴
之什兮載誦麟趾樛木之篇徽音足嗣乎千古兮眉壽當
齊乎百年何瑤池之促駕兮遂鸞馭以蹕躔嗟莖臭之云
香兮望琰光而弗燁忽聞訃而心惻兮摛蕪誄而涕漣誼
關婚媾之戚兮忱托楮帛之幾佇

綸褒之寵錫兮慰慈懷于九泉靈有知而不寐兮共來格乎
几筵

饒鎮順恪吳公墓誌銘

楊旬瑛

余蚤歲當明季之末則已聞粵之潮郡有葛翁吳少師公
其人者慷慨有大節惟誠下士能以除暴救時為地方所
倚重者若而年余心甚儀之迨辛卯冬奉

璽按粵則復聞公以前排印宮銜挈一方土宇以上我
朝而且効力征勦屢建異績

天子加悅公之忠誠勞勩

恩典渥優易曰在師三錫何以加焉今日者臺灣餘孽尚煩
掃淨勢必以三省會勦公方將豎偉烈於海表建鴻名於

麟圖以仰答我

皇上寵異勳勞之至意乃積瘁臥疴大星告殞

天子動容嗟嗟優卹備至凡我東南人士無不推爲鞠躬盡瘁死而後已者其吳公之謂矣日公之子總戎君千里馳函謂余實按粵目擊公之忠悃與馳驅建功之狀甚悉今秋將奉魄以藏焉其能無一言以永貞取余不敏誼無所辭謹按狀公諱六奇字鑑伯葛如其別號也先代以延陵派分閩下復創居於潮之湯田鄉高曾以來隱德具盛至公之尊人贈公尤能承詩書之傳而燕翼之公生而負異

表讀書穎敏胸有雄畧不屑爲閭里落落者等蓋當少年

五人咸知其有匡世之器矣迨及壯歲丁明末紛擾之際潮郡大盜迭起滋蔓難圖公發憤爲鄉閭計偕其弟叅戎君廣集精銳厲師以向殲逆討叛遂爲一時長城當事者因畀公以豐順之任前後討平亂首如鍾林秀葉灣婆張文斌林參寰彭士炳劉良機等皆其所計擒而誅鋤之者也滄桑告變澄寇黃海如九軍劉公顯及江龍等譁張於潮郡而陷揭陽陷大埔破程鄉以及三河者在在見告公糾合熊羆提義勇之衆以搗之立解郡城之圍復三河大

埔盡殲程平九軍之賊於焉舉錦江上游數百里地寓兵於農設團練以訓習鄉衆地方晏然以其時

本朝大兵未至人情思亂設非公綏靖而豫防之幾何不桑麻而陸沉家室而塗炭也哉戊子歲

大兵旣至

兩藩宣布

德威公遂領人衆傾心歸附而爲

王前驅進征削平之舉連年竭蹶靡懈矣潮將郝尚久據潮以叛

靖藩統師致討公爲潮疆協鎮躬督精兵數萬前行人人効死用命無不一當百諸凡糗糧芻茭之運火藥炮器之需罔不備周用佐一鼓恢克之力城下之日渠魁旣殲其脅從者力爲請命所存活士民不可計數繼而湯坑藍霖九軍餘黨復嘯聚負固大爲潮郡貽患公則自統師直搗其穴破馬頭山寨而盡掃之潮疆旣平余時負斧于粵會撫軍以密疏上其事蓋時亦有投誠在粵者握兵自恣密疏之發一以彰公之勞復將以懲諸弁之縱也

世祖章皇帝嘉公忠勤懋著屢建大勳

特賜饒平之履昇以

專勅方印俾嚴鎮守而援剿之權則無分疆界公受事未幾
逆艘大舉入寇連陷揭陽澄普三邑公疾提官鄉兵會
兩藩諸鎮之師戮力恢剿枕戈疆場者八閱月乃克奏膚
三城既復卽逋寇之橫據黃岡者亦已誘而就執爰遣裨
將汎守俾片帆不敢窺犯焉惟是海島餘魂憑海爲患公
奉

旨造船會勦廈門之役立治數十巨艦又募習水師將士以
行年來所捐累數萬金不計也鷺島旣克復奉

詔往諭南澳公宣揚

天子威命於是識時者幡然輸誠恐後舉全澳之將士黎庶
及銅陵諸嶼聞風向化梯帆而踵至者其麗不億公悉給
瞻糈以寧幹止厥費亦復不貲繼而又有木窖之賊處太
埔平和之間公往勦擒渠底定更無有跳梁草澤間者而
山海胥告救寧矣至公之自固厥圉也築饒平城垣建饒
平大埔學宮及郡學之明倫堂士類嘖嘖又修建黃岡城
築西林營寨頻年經營拮据次第告成所捐各數千金古
稱公爾忘私國爾忘家者公何歎焉公蒙

眷命之隆三晉官銜兩膺

欽賚一品

榮封上及四代

恩蔭隆典下逮後人

朝廷之所以待勳勞者焜耀一時公素以忠孝自勉又歷荷寵錫隕越是懼緣奉

旨會議封疆之事益夙夜綢繆罔懈雖至勞瘁之積繁劇必親及沉疴日甚度不能起乃自草遺疏暨具啟事誠可謂克盡疆場大臣之誼者矣若夫公生平至性莫大于孝以

友于兄弟其祇事一人也夔夔養志備極承歡歿而廬墳思慕無日不嗟咏岷岵之篇者始終身焉其於弟也怡怡之愛日取策功揚名致身竭力之事以相勵勉推而至睦族施予必隆又復誘勸子弟朝夕考課以期振家聲而至待友下賢則爲篤管鮑之交厚金石之信其於文上尤深愛慕適館授餐如曾君日省陳君本一游君定海饒君寵偉皆拔黌序以次掇科名者其他所品藻造就尤未易更僕數故景慕風聲過都越邑而至者無不謂吳公實肝鬲我且能生我也又推而鄉黨之排難卹貧日有厚誼遐邇

豐順縣志 卷之八
為傾心焉公賦性溫恭臨事敬慎待物以誠遇下以恩綜理之勤自朝至日中晷不遑暇食者數十年迨公餘則好與紳儒及諸門人稽古論文諮諏時務至疾革而調將領誠子弟惟諄諄然以忠孝為囑嗚呼若公者真天地之完人又不徒以智勇大將為名者耳公既以遺疏上

聞

天子重加憫念贈少師特進榮祿大夫

賜謚順恪遺官祭葬欽奉

御製碑文又破例

特與以饒疆重地兵馬夙練

勅總戎君統轄嗣守先職仲子啟爵承

恩禁掖卹忠之典未有盛於斯時者也公尊人贈公諱廷符以公貴

誥贈光祿大夫左都督如子官太母胡氏

誥封一品太夫人公兄弟二人公居長弟標分守鎮江叅將公生于明萬歷丁未年七月十二日寅時卒於

大清康熙乙巳年五月初三日辰時享年五十有九舉丈夫子十有一後蓋未有艾云今奉

勅造瑩擇大埔縣清遠都之湖寮鄉龍爲帽山之秀穴負壬
揖丙欽依

御賜一品典式營造以六年七月十四日安厝焉爰爲之銘
銘曰

勃萃者山鬱蒼蒼者林忠孝大德山高水深幼負才畧匡濟
宅心梓里干城式靖蝸蟾傾心歸命

寵錫榮昌

天子曰都匪子特揚矢志報

國護我粵東粵東悉寧累積戰功枕戈夙夜盡瘁厥躬聿

殲巨寇復搗鯨居艫艨備飭鷺島坵墟肅將

威德遠暢無餘彤弓斯貺

錫命慇懃焜燿寰宇竭蹙彌殷致身後已

卹典軼羣嗟公之德如圭如璧嗟公之功銅柱竹帛潮疆永
賴燕貽流澤煌煌

御製華袞萬年鬼神呵護馬鬣雲天爰卜熾昌衍慶其延

忠孝堂集序

洪圖光

今海內以文人自負者大約芳洲杜若沅沚澧蘭或泠然可誦不過騷人逸士之章卽蜃海鯨波倏忽傾瀉作者氣吞雲夢讀者亦驚若漢河而性情不可問文章亦未可傳耳蓋古今大文人卽古今大英雄未有不具忠孝之性者也昔李青蓮供奉翰林題詩鳳凰臺上杜錦里袞職軍儲堯封禹貢固感時憂事者之作而忠孝之氣自負者若何至歐文忠力砥狂瀾韓侍御克乎鱷浪使非以大文人具大英雄氣概其能驚風雨泣鬼神震盪古今天地間耶順

豐川集卷之六
恪公吳老先生少慷慨負氣好擊劍善射博通孫吳兵法
兼事舉子業適天下喪亂赤眉銅馬相繼騷先生謂丈
夫當立功疆場封侯食邑豈能作咕嗶語倖厠一官迎人
色笑爲耶爰投筆去遂叅戎伍歷軍功以上將軍節制潮
郡是時金甌未固盧循仙芝之輩出沒無常先生力捍禦
之其功已繪麟臺不容更贅乃其性好詩書卽百萬螯弧
中未嘗釋卷蓋潮郡濱大海之南風土鬱雜且烽煙初熄
鱸堂講帳旣馬鳴嘶泮水芹宮刺荆蕪塞先生以潮風被
昌黎遺化方將建學明倫申安國之教規講伊川之性命

廼令鬻序坵墟文風於何振耶爰出俸錢下郡邑大修

孔子廟一時堂皇巍煥車服禮器粵人士以時習禮於其
中先生又或登坐堂上進諸生與語道學辨古今事宜惟
以忠君孝親爲重潮之士氣丕振咸先生爲倡導焉先生
又素慕平原爲人朱履紛踏四方從遊者倒時仲宣之屣
時罄疏廣之金或迎秋月而坐共元規或佩春風而樽鬪
文舉應酬之暇又乘藍輿小憇山寺對黃面瞿曇談釋迦
佛法先生以大英雄具大文人丰骨宜其倜儻自如爲當
世人傑也哉予時奉

命出宰程邑每道過其處左右紅帔握刀佩弓立迎道左宛
行細柳營中赫赫軍威不寒而慄及入帳圖書滿座翰墨
風清直似偕青黎老人登天祿閣偶語酒酣耳熱時先生
間出所爲文命予披閱夫以先生勛高宇宙卽在儒將風
流亦第飲酒娛賓投壺歌雅博一樂事耳而二十年來興
賢建學重道崇儒悉以濂溪晦菴諸先生爲法有時耑征
奉

命必詣廟告期而奏凱旋師又入泮獻馘昔王文成講學龍
溪立決不庭爲弁髦倫紀者戒先生之功首重庠序非卽
以忠孝訓世歟至若

奏疏條議關切

國家利病其愷切不讓陸賈益足以光史冊垂奕世者哉
今先生往矣度其精誠固宜環護宮墻與諸先儒共襄文
治而遺編具在令子文源昆仲雄才博學竊善讀書知先
公之文有關君父大義爰命梓人亟登梨棗是先生之文
章傳而性情與共傳殆又以大英雄見聖賢身爲世說法
者矣

志孝堂文集乞言引

吳啟豐

嘗聞爲人子者父沒而不忍讀父之書爲其手澤存也若夫志事所寓見諸手作則必取先人之遺篇而卒讀之且輯爲一書以貽來世此又人子事也豐不孝追惟先君順恪公少治經生業才識天授迥出文人當芸經董帷時每一操觚卽超然自異不屑爲腐儒文字及慷慨投筆所期遠大則不復以鉛槧爲事矣然身在封疆二十餘年讀書搦管未會一日或輟是以著作之積至盈篋笥大都以立德立功之志而爲立言凡所爲文皆獨抒靈心發乎至性

而一本乎生平之所學非忠蓋之下悃不敢以封事上

君王非安攘之碩畫不敢以條議獻當事非建樹之成功不敢以夸言勒碑碣故一切敷奏紀事以及祝頌祭告之章莫不歷其誠而既其實去其諛而芟其華至於裁緘披縑拈韻寫懷亦復真誠樸雅而不以藻繪爲工總期力追古人足訓後嗣固將與竹帛瑣珉同垂有永也不孝向以功齡奉先君命肄業家山不能盡得睹記茲旣嗣守先服視事師中始從曩牘悉搜遺稿而誦法焉先君之志事固概見於此矣雖繼述未能而表章難已爰錄其謀篇之大者

得捌拾叁首敬集成卷帙鐫之梨棗將畀諸孫子且與海內共見之尚冀縉紳先生丹黃訂正加以弁言賜之華衮斯先君手澤得與燕許大筆並傳於不朽而不孝之子職亦庶乎藉以少盡皆仁人錫類之教也不匱之恩敢不永言百世哉

曹山寶林寺記

鄭耕

豐順西南三十里許有曹山山形低小而奇峰怪石古樹
幽泉靡不畢具其地靜以深廓乎有容元時建刹寶林歷
今年遠鞠爲茂草康熙癸巳上人守白見而挂瓢焉長源
吳君爲之充拓得山若干畝重建佛寺塑佛像而潛修其
中山上有潭旣潔且冽樹石陰翳如峨眉積雪經夏不消
守白名之曰初有下復有潭四相離而遞續其聲潺潺瀉
乎寺之左右冷人心意堂前水流屈曲圍繞引入茶灶之
旁清澈而甘名曰一線泉寺中有鐘僉云飛來居人誌之

大與峽山寺相類寺左遠望有峰尖聳雲霄嵐霧浮凝晨
 青夕紫不減舒州景况擬曰擲錫峰右石或三或五羅列
 門側如禮拜狀則曰聞經石小溪自山入村植桃其上落
 葉抽枝天容水影禽鳥之嘯吟烟雲之淡蕩則惟諸佛受
 之而守白有之至若日色在天風光在野塵想遙飛虛空
 寂淨見與不見情與無情得入斯門類皆瞻仰守白優游
 獨處耕石鋤雲開經示偈洵足樂也山中多藥不種而生
 有病者服之即瘳人病有盡我藥無窮寺外田禾出無量
 米作無遮會香遍十方及於法界聞之得飽蓋不待琉璃
 玻璃碾磑碼碯之屬一寶林矣忘何地無山何山無寺何
 寺無境何境無人成之者天得之者人境自境也人還自
 人人境之中因有是記

募修鳳凰山太平寺引

吳啟鎮

地有名山必有勝刹以潮人談湖勝則鳳凰山其最著者
層巒疊翠高烟棲雲景難筆罄昔年先君蒞饒巡行觀其
山川佳勝買山建寺名之曰太平蓋指我

朝定明季之亂除寇安民自此太平之義也召僧住守祝國庇
民二十餘年於斯矣歲月既深棟宇傾頽僧照吾者懼勝
蹟之下修有墜先人之盛意愾然謀於余而新之余不才
棄書學劍奉

天子命守濱海斯夕所孳孳者增雉堞嚴斥堠黽勉職司保守

疆圉未遑他務惟斯寺之建也戡禍亂興太平成久安長治之洪基特著斯名以昭示來茲俾後之人顧名思義知功德之隆感慕於無已則於

國家不無小補何敢聽其廢墜第力獨成難倘荷同心慨然樂助則名山重輝勝剎再煥咸拭目以觀太平矣

鎮瑞姪承恩圖小影贊

羅松樓

彼何人斯鸞停鵠峙天宮派孫封閩支裔生平襟期瀟灑樂只今則冠帶加身肅容備禮捧盤獻盃鞠躬謹爾是胡不爲解衣盤礴徜徉自喜乃莊爾容慎汝止其心蓋曰我親如在優游杖履事生事存終身永矢我將以薦其時食者貽後人作個樣子

遊豐溪記

葛亮祖

浙江人

豐城皆溪也夾流於萬山之間爲一邑勝概共發源有

二一自縣南豐田嶂蜿蜒而東復旋折而西北一自縣西南言嶺諸山盤曲而西亦會合於西北紆迴奔注過下湯出產溪入於陷隍之大河蓋幾二百里云溪多石骨峻岫布列舸艇難行豐民每以鮮舟楫而多負擔爲勞然灌溉者于斯縷汲者于斯有自然之美利世享而未之知也城西數十武溪有沙渚約六七畝上爲墟市以一四七爲期民間日用飲食於是乎在肩摩駢集四方群赴而貿易焉

墟下卽邑人所稱湯山也周廣畝許怪石星羅若蹲獅若
立鷓若游魚之聚泳臥虎之馴伏中有溫泉宛然列鼎而
炊者一二十坎或同沸釜或如噴雪清和而薄霧氤氳微
風而輕烟繚繞霜晨雪夕莫之或異凡士民之朝而沐暮
而浴以浣以濯者咸就給焉且其泉能療諸疾有利無害
斯誠取之無盡藏用之無窮期山川之靈異造物之特奇
者也夫豐當明季爲辟盜淵藪士女不遑寧處遑問流泉

我
定鼎邑人吳少師起而廓濤之

國家置澤單敷大化翺洽百年於茲猶虞海揭嘉大之偏隅
斷摩木適割爲新邑設官建治以永保斯民今者山高可
仰泉清可汲豐之人得於暇日遨遊於溪光雲影之間其
可不知所自哉余每因稽理工程之餘徘徊溪上萬山疊
翠掩映清流顧而樂之又嘗尋寶寺之桃玩龍山之月訪
太陽古榕而不能數數至也若夫韓策之雲銀瓶之雪淨
水之鐘揭嶺之泉存諸想像而未嘗一至其地然則二載
以來余所爲旦暮優游而忘倦者非此清溪白石有以豁
旅情而助逸興也耶旣以自快而并爲豐之居逢名勝而

豐川縣志 卷之八
生際熙皞者慶也因記其大畧以志不忘若此

新建安敦書院記

葛曙 邑令

士習者民風之倡學校者教化所資是以

天子自首善而外凡郡邑莫不建學而大小吏推廣作人至意復增義學慎選師儒由來尚矣豐順潮之新造邑也潮自唐時韓昌黎爲刺史舉趙德爲師韓公以聖賢之道倡化趙子卽以公之教教其民而習俗翕然丕變延及於今潮郡人文甲于東粵豐之民僻處山谷見聞稍陋不無樸僿之虞然向固嘗被化於昌黎者也且我

皇上德教覃敷無遠不届特開新邑肇立學宮凡所以訓誨而

豐川縣志 卷之八
牖迪之者無一不備則澤以詩書文以禮樂非守土是責而誰責哉余不敏承乏茲邑竊見

大憲殷殷圖治首重教民粵秀端溪兩書院延四方碩學爲之掌教廣羅英秀肄業其中四時考課至詳且密潮之韓山書院亦體此意以樂育莫不爭自濯磨郁乎彬彬念我豐人離省郡遼遠可不近爲措置以承流宣化哉初抵任一切工程嚴迫未遑他及歲試見童子來赴者千六百有奇雖敏鈍異材咸欣欣有向風慕道志小子有造進而教之藉於師儒之砥礪亟矣爰與邑之紳士謀建書院而難其地一日登安敦嶺縈青繚白陂陲平行前俯豐溪溪上古榕數樹圍抱殷茂不知何年代物游魚飛鳥熙熙然遨遊於上下乃嘆風塵俗吏終日案牘向之艱於擇地者今乃於斯乎得之也遂捐俸爲紳士倡構書院其上於乙丑冬經始于丙寅春落成卽名曰安敦欲其顧名思義也特事方草創膏火尚虛後之君子以漸擴充諒有同心由是選擇名儒勤加鼓勵庶向風慕道之徒盡去其樸僿上接昌黎之傳以副

聖天子暨 各憲作人至意以爲邦家光豈非豐之幸而余之

大願也夫因爲之記

溫泉記

葛曙 邑令

湯田之名由溫泉得也出豐城西北數十武可望而卽其泉似有神炊終古長沸于于焉虛往實歸居民賴之稍遠爲墟場交易而退成就盥濯會莫之禁夫待舉火者因人而熱何如泉之自然而熱者不言所利其利溥哉向使離城遼遠汲取實勞安能僕僕道里爲澣濯漑瀉用卽以爲神等諸棄壤耳物以適用貴泉之近城其亦有幸乎間嘗徐步往觀蓬蓬勃勃如釜上氣不可嚮邇下數坎氣漸平和因思假我數椽做浴沂故事致足樂者獨怪無先得我

心既而知溪漲水高常遭漂沒又未嘗不嘆所處之卑而
爲是泉惜且不聞中於膳飲豈以近溪而溪流清且潔歟
或謂疑有藥物然吾於茲泉獨有所取蓋泉而冷常也易
曰井冽寒泉詩曰爰有寒泉若夫溫春氣也陽氣俱烝土
膏其動萬物發生豐爲新造邑倘藉此一脉溫和民物繁
滋形家所謂旺氣未必不從茲泉乘之第曰能除瘡痍特
其小補吾之爲豐望者俾一邑之疾痛咸消始賀斯泉之
神休無既已不可不爲之記

詩

飛泉嶺

宋 朱 熹

梯雲石磔羊腸遶轉壑飛泉碧玉斜一路風烟春淡薄數
聲鷄犬埜人家

題瘦牛嶺

黃公度

日嘆年來爲食謀扶攜百指過南州時平四野皆青草此
地何曾見瘦牛

前題

楊萬里

行遍天涯意未休循州過了又梅州平生不憤乘肥馬者

去須教遇瘦牛

遊溫泉

明張翹

十里青郊路看山與未窮乳泉溫石火茆屋貯春風野老
追隨久康衢笑語同武陵幽絕處只在小溪中

留隍夜宿

郭子章

產水驛前洄留隍路已開海雲隨浪捲竹月破窓來猿鶴
時相狎鱷鯨不用猜秋聲飄嶺樹歸夢遶鄉臺

漫題

吳殿邦

家在飛泉玉簡峯草亭經日對杉松晴嵐秋壑無人到惟

有風篁亂石涼

葛布舟中風雨

何仕冢

世路多艱涉孤帆黑夜開濛瀟蘆荻岸漂泊水天涯苦海
從心渡驚波拂面來自憐形影弔誰識濟川才

迫山寇宿上陽同馮明府聯句

郭之奇

試劍雲初集

郭之奇

投戈日未傾食漿明俗厚

馮元鵬

袞

帶引風清塢遂回春氣

郭

村鷄促夜聲愁聞五更角

馮

不

盡壯悲情

郭

人日遊七娘灘值雨

羅萬傑

去歲山中逢人日今年人日仍登山經邱自足情兼具尋
壑偏宜靜與閒雨映疎籬花的皜煙生野徑石爛斑坐聽
僧梵歸來晚屐齒衝泥趁濕還

元日值雨同雪樵上人作

愁值上元雨空山靜掩扉茗烟輕冉冉香縷細霏霏窺牖
月光薄照龕燈影微祇應禪榻上夢與白雲歸

山居禱詩

萬山深處一閒人手葺蓬茅老此身淡粥盈壺壘滿鉢家
風不改舊清貧

其二

嵯峨石筍連雲栽樵徑無人任野苔最愛東風明月色夜
深斜入雙扉來

其三

灌畦日暮荷鋤歸滿目蓬蒿夕照微黃葉乍衝鳥語落白
雲時繞磬聲飛

其四

冷落柴扉晚不扃爨烟遙映夕嵐青芒鞋轉入茅岡去折
得梅花插膽瓶

其五

半鈎斜月掛巖屏香篆初殘睡正醒橫按一枝無孔笛峯頭吹與石人聽

其六

吟成半偈剔殘缸突兀睡魔未肯降楸一爐香一炷卧聽微雨打寒窓

偶題

生計巖前樹素交雲外山愁來天地老醉去古今閒

其二

樹老幽人屋雲深野衲家門垂彭澤柳圃接邵陵瓜

感遇

青青礪底松倒懸蒼崖壁葳蕤含宿露獨立無人側上有烏鵲棲下有驚湍激念茲霜雪深况復暑寒積勁質久難靡孤根諒不易所嗟匠石稀一顧三歎息

齋中卽事

披書當對客庶以懲我短焚香當灌菜庶以止我嬾溪光發幽獨柴扉涼氣滿微雨過竹色筍箨於茲澣亭陰樹影攢塔暝鳥聲緩心靜有餘閒起候茶煙煖

除夕同明度上人逸老庵守歲

殘年抱病隱園中
潦倒幾忘歲月窮
窓對木蘭花正白
爐添榾柮火初紅
天寒乍覺香消霧
夜靜頻驚磬逐風
閉戶跣趺少俗語
辛盤聊與山僧同

賦湯泉一十六韻

國朝 鄭 濂

久厭塵市喧山行愜
心目蒼崖透孤嶠長
林翳深綠溪迴徑自
轉徐入小橋曲何處
白雲起離離佈前麓
父老向我言有泉在
茲谷鬱若霞霧蒸非
炊煙自蠶其下若濺
珠其外堪盥浴其中
若沸湯大寒莫敢觸
予聞為驚疑疾趨戒

僮僕憇息此泉下
徘徊數徃復天下多
名泉無如此利俗聞
有甘若醴冬月不堪
掬亦有香若麝貧者
非所欲溫泉是處稱
火候未俱足弗若此
泉佳于焉似杼軸我
甚欣此泉酌之將滿
腹

龍祖寺

麥天縱

不遊龍祖寺安識洞
中奇伏石多驚虎逢
僧忽訝師入雲依五
色掬水味三危支遁
愛山切應留借一枝

小墮墜

黃 華

連山不可極斷處見
人家野廟依喬木孤
烟帶遠沙竹圍

千畝綠鶯破一溪霞何必秦人谷偏誇兩岸花

秋日遊藍定庵

羅國珍

逐鳥尋僧去寒隨客路深香依嵐裏馥磬徹水中音疎圃
半生意平燕一片心閒來秋日話霽色滿江陰

落漢鳴泉

藍田削壁見飛泉隱隱晴虹百丈懸朱子石函留洞宇秦
皇古戍靜烽煙無邊珠玉因風洒不盡琴箏鎮日傳最喜
源頭多勝槩於今流水滿前川

溫泉 七娘灘山下

羅萬善

一灣徹底清萬點如煎沸不火自然溫春冬騰煖氣我聞
燒地古神湯世傳伏石有硫磺沂流曾經狂士浴驪山舉
石幸君王茲泉產向窮山裏牧豎樵夫日至止濯足潑水
戲歸時猿獠來飲蹲水涯古泉今泉溫無二此泉彼泉用
之異白礬空作雲霧蒸起源得地方爲貴

登飛泉嶺訪朱夫子遺蹟

黎偉光

五嶺東南障飛泉號揭陽輿形通粵險戍壘入秦荒路恍
天台似僊疑鶴嶠藏捫蘿緣鳥道理策遶羊腸古木盤千
曲幽巖漱百芳我來尋篆跡磨石認靈光

題揭陽嶺

方國才

五嶺南州舊有名飛泉一臂更峻嶒天懸翠壁連雲起路
近青霄傍日行故壘已荒征戍地殘碑常載紀遊情我來
躡屐高峰上懷古歌餘感慨生

藍田山居寄友

陳海春

藍田山南南山麓茅葦數家連烟竹白雲秋曉不歸山清
泉盤磴出谿谷自苦山深住無鄰山堂午夢驚猿鹿平生
喜爲詩酒歡今我何以慰幽獨雲水感君心迹素寒霜念
我鬢髮禿青燈相對聽槭槭明月何時談昔夙一枕桐聲

令到帷半夜心逐南飛鵠

望牛山釣臺

羅基恒

石畔望牛處士家釣竿曾掛夕陽斜不將邱壑易軒冕留
取高風伴落霞

上巳後一日重遊七娘灘

羅紹哲

重到灘邊去良遊豈易常風前人跡靜雨後泉聲涼山竹
添朝綠野花隔宿香石頭記坐處昨日嘗飛觴

曹山寶林寺

吳啟晉

野客漫行肅寄前老僧隨喜覺殷然臨淵潛出聽經鯉履

逕遙聞說法仙月央禪林山水秀雲橫梵宇地天連重遊
此景知何日淡看黃花度小年

前題

林作棟

曲水回流靜室前潺湲入耳轉蕭然晨鐘罷後聞啼鳥暮
鼓殘時有嘯仙石勢低昂同起伏峯巒續斷總相連上方
自是無塵近面壁何須待九年

遊初有潭

釋真樸

清景闕幽崖冥冥不可扣羃羃蒼松雲千古迷昏晝烟局
朝已啟竹石生左右一徑入蒙龍幽泉道寒溜迺窮空潭

陰林蔦席莓繡濛濛登崩濤蕭蕭風雨闕下矚旣澄瑩日
光射潛竇清見歸柯鳥靜落板藤狖回環遠峰攢百靈何
時守則是混沌天開闢有先後三秋瘴癘鄉茲遊迺奇遣
不知炎伏間誰能私枕漱

寶林寺六景 飛來鐘

釋性曉

曾聞大冶出胞胎驀地洪音震雷喚醒定中霜夜夢却
疑獅子復飛來

初有潭

何年潭水翳林間今有清光見此山一任風來波不起潭

心可似老僧閒

一線泉

泉與曹溪一樣深
紆迴一線出幽林
世人不解清清意
拋却源頭向外尋

桃花溪

清閒未許住深山
手種桃花溪幾灣
回顧落花紅片片
不隨流水到人間

聞經石

無論晨鐘午磬時
堂前惟恐聽經遲
世間那有痴如石
住

在深山已不痴

擲錫峯

曹山萬仞翠巖從
再進竿頭路可通
昔日隱峯何處去
空留一錫白雲中

東門城樓玩月

吳之駿

水輪初上最宜人
影徹東樓分外新
葦屋冷涵如在水
碧欄高立若無鄰
風過翠竹偏生韻
烟散蒼松別有神
最愛山城清夜裏
玉壺誰與倚秋旻

太陽宮古榕

豐川縣志 卷之九
大樹當時不次功，偏留此地聳青葱。
重枝疊幹天然景，錯節盤根造化工。
入夏陰翳能蔽日，凌晨蒼翠欲乘風。
鄉人處處陳牲醴，土鼓頻敲祝歲豐。

龍山遠眺

曲折層巒古路幽，扶筇直上豁雙眸。
蒼茫遠樹平如障，寥落孤村小若舟。
四面松風聲淅淅，一灣潭水影悠悠。
地靈莫謂無人物，甯戚當年困飯牛。

銀瓶霽雪

張大光

雪霽銀瓶淨，清光播遠天。
瓊花凝素岫，白賁籠輕烟。
萬里

星河淡，千山皓月圓。
一峯登眺處，不讓玉堂仙。

五羅東禱雨

峩峩顯嶺自天開，嶽立層霄靜不回。
老幹數支雄海嶠，團雲幾處護崇臺。
神威不許商羊舞，大力能教旱魃摧。
應是天心憐瘠土，故令斤鹵盡滋培。

南山寺聞鐘聲

竹搖清影瘦孤岑，古寺蒼涼一望深。
滿座曇花空俗諦，半簾明月印禪心。
浮生癡夢憑誰喚，幾點疎鐘出遠林。
何事景陽樓下立，始稱人世有知音。

佛泉悉觀魚

吳凱先

誰云鷗鳥始忘機
水底潛鱗詎不如
赤子固應皆佛子
木魚何弗感潭魚
聞經自赴龍華約
聽講還分貝葉餘
最愛懸崖高處立
會心多處一躊躇

上陽為藍田勝地其俗渾穆近古將修舊廬往居焉

作愛上陽二首

羅松樵

我愛上陽好人烟
簇舊墟蒼山圍井甸
碧水抱田廬春暖
樹盈岫秋陰雲拂
畝古菴餘老木釣石
傍清渠閒靜從茲
始覺塵日以除假
錢來卜宅結伴樂
樵漁

我愛上陽好醇風
近古初比隣無異姓
歷世有同居麻桑
授春服稻梁供歲儲
饌因老者設酒待客
來滑少女能勤紡
丁男解讀書美哉唐
魏俗可以化龕疎

過逸老菴

明銓部庸菴
伯歸隱處

夕陽停過棹
覓徑到僧家
蛙噪一池水
風搖幾樹鴉
晴嵐當座翠
野竹拂堦斜
見說晚香好
重來就桂花

宿店前

土墻隣獨樹
結宇倚南坡
山向門前起
泉流厨下過
村童知識少
行客旅情多
入夜峯頭月
清光滿澗阿

秋日過猴子窠 乾隆丙辰鄉科 予不赴秋闈

嵐深峻嶺鎖重阿 秋日閒過逸思多 野店倚崖明夕照 晨
裝歷磴拂烟蘿 數年逐隊徒勞耳 此際匡居奈嬾何 自古
力田勝射策 山靈招我樂婆娑

八月十五日晡同諸君子登陂下巢和葛卧南先生

原韻

徐 埜 浙江人

何須九日始登高 為愛青山不憚勞 細草平陂臨絕壁 疎

松夾澗響晴濤 心儀謝傅風流劇 頭白吳儂逸興豪 秋色

平分當此夕 一輪早喜映綈袍

豐溪春漲

柴致和 浙江人

春郊雨足水溶溶 碧漲前溪澗幾重 人在抱山堂上立 黍
苗到處有膏濃

龍山秋月

碧天無際月輪高 獨上龍山逸興豪 咫尺廣寒宮可接 五
雲開處響仙璈

揭嶺飛泉

何處源頭活水來 珠噴蛟舞到山隈 吳綾百丈懸危壁 不
許并州快剪裁

銀瓶霽雪

誰把銀瓶換玉龍
瑩然冰雪靜雲封
凌空獨插層巒裏
知是瑤臺第幾重

淨水遠鐘

數椽高踞萬峯巔
寂寂空山不計年
一自鐘飛來絕頂
祇今人說口頭禪

古榕夕照

離奇天矯欲摩空
疑探扶桑到海東
山色漸隳村社靜
一長斜掛夕陽紅

古寺桃溪

沿溪何必定桃源
灼灼飛英靜不喧
老衲坐枯林畔石
相看一笑已忘言

韓叢雲封

一峯高聳盡層霄
不盡烟雲護半腰
似為名賢留勝蹟
空山千古識高標

古榕夕照

陳浩
浙江人

近城喜得古榕坪
天遣雷分棟宇成

舊傳榕為雷分

山色遠凝千

嶂紫溪光斜映一灣清
鳴和谷應枝間鳥
暑却涼生葉底

併對景長吟歸向晚披衣不覺夕陽迎

淨水遠鐘

山嶽靈時鐘亦靈我聞在昔有奇因一灣如鑒塵何染無

翼能飛運若神

舊傳寺鐘自遠飛來

響徹中宵清俗慮音傳空谷達

高旻年來客路多塵夢欲向禪關拂拭新

豐溪春漲

一溪春水遶城流四野奔趨潤綠疇雨洗飛花紅躍浪風

飄舞絮白翻洲層層峭壁波中見渺渺間鷗物外遊堪作

當年濠濮想心胸盪却幾多愁

龍山秋月

徑入龍山象外幽遙瞻古寺白雲秋燈寒丈室僧初定鳥

亂棲林客晚留露重枝頭千葉落光涵嶺上一輪浮莫言

於此興猶淺試作東山着屐遊

古寺桃溪

若為祇林集異珍溪桃爛熳倍生春水流花放增天趣梵

唄鐘聲遠俗囂擲錫峯頭清欲絕聞經石上淨無塵

峯石寺中

實跡飛英莫向人間去怕惹漁郎又問津

韓東雲封

韓公去後策稱韓高進諸峯百尺竿嶺徑崎嶇行不斷烟
雲變化幻無端縹緲成錦繡天孫舞裁作文章山斗觀豈是
無心閒出岫乘時爲雨盡龍蟠

銀瓶霽雪

峻嶺無勞斲削成望中寒雪倍分明凌空高插琅玕樹蔭
地周遭雲母屏天爲巖壘增玉壘人從海嶠拾瓊芝陰靈
散盡光彌潔照徹瑤峰萬丈清

揭嶺飛泉

昔賢會此駐征鑣爲嘆羊腸曲遶勞

朱子有飛泉嶺詩

峭壁春迴

巫峽浪晴溪秋散廣陵濤渠成不俟西郊雨派遠分流南
幽青邑自更新山自古幾回極目興猶豪

古榕夕照

朱嘉禾 浙江人

秋郊何處覓芳菲老幹千年性不違遊客與幽閒徒倚暮
鴉知倦半歸飛小橋流水環行陌遠岫晴嵐帶夕暉莫惜
歸遲重展眺牛羊來下掩柴扉

豐溪春漲

草長平沙水漲溪風翻碧浪遠山齊沿崖汗漫幾吞浦觸
石迴流欲撼堤滿郭烟光迷鷺影一川湍響亂鶯啼春郊

正直深耕候歸步平疇看犢犁

癸亥臘八豐順山行

葛亮祖 浙江人

鷄唱行人發風寒路絕踪溪雲籠曉日山黛鎖層松涉澗
流聲細登高嶺勢重斜陽開晚景蒼翠滿前峰

豐邑卽事

百里封疆建置新萬山深處誠心勞作堵經營久望
切移風案牘清鞭朴不煩倉箱有獲室家盈浴沂

舊事多真樂閒訪溫泉遺我

八月十五日暮偕友登豐下嶼

秋光滿野勸登高興至攀援憚勞歷歷煙林平若薺重

重雲岫湧如濤跋山筋力衰猶健對景情懷老益豪皓魄
欲升歸未得清風習習拂征袍

言嶺關落成

雄關當嶺勢從龍扼要東西設險同鳥道千盤穿絕頂螺
峰萬疊繞晴空工與農隙畊無害守固岩疆事有終半載
經營成可樂且凭禪榻聽松風

豐溪溫泉

溪曲繞城圍泉流淑氣呈炎蒸非在暑鼎沸不聞聲盪滌

塵容淨驅除病體輕群情安故習誰識化工宏

豐順山行

葛

輿

浙江人

行盡羊腸道崎嶇跬步逢兩山如踞虎一徑儼蟠龍澗水飛危壁松濤起遠峯計程方百里層折幾千重

豐溪

雨足郊原潤溪流一派橫水高洲漸沒磯激浪難二芳草相連碧浮鷗逐隊輕春來多逸興倚杖遠含情

揭嶺

五嶺皆天險奇觀揭最宜古傳秦卒戍人誦晦翁詞嵐氣

晴還雨泉珠舞且垂幽遐堪避世欲出意先迷

夜行山中

葛

曙 邑令

傍崖茅屋兩三楹深入層山不見人犂确崎嶇行未盡一鉤新月挂前津

巖迴樹影森排戟石激溪聲響股雷臥犬不驚行跡斷無人知有長官來

漫山蟲語送秋聲嵐氣相兼夜氣清欲向此間稱吏隱自慙五斗負躬耕

看山不費買山錢屈曲籃輿趣獨便敢羨取砂勾漏好千

巖深處飽清泉

過言嶺關大雷雨

霹靂動空谷風號萬壑間
泉聲怒危石雨勢倒層山
避濕鷄棲木衝泥客度關
此中有清味與僕莫言艱

山村

荒村臨斷岬一徑入雲烟
迎人吠蠻童逐隊看小溪
隨嶺曲高樹挾風寒可憐
遙想山深意象寬

山行見茶花

開落空山裏無言對朔風
清溪一照影脉脉素心同

舟次烏石塘

殘霞川上動暝色滿前山
何處清歌發漁舟唱晚還

產溪曉發

高峯初上日霜冷一溪烟
密篠開幽徑層陂結小屋
趁墟人起早爭渡語喧傳
自得宦遊趣誰言此地偏

山中夜行口號

深巖月黑怪鳥啼風搜石穴
聲長嘶倚崖老樹屹森立下
臨百尺潺湲溪僕夫足繭不
能進千山萬山方端倪我行
顧此三嘆息惟土養物功莫
齊磊磊頑石將焉用山如有

靈還自詆安得五丁擘巨掌削平峻嶺成町畦春和雨足
催布穀草淺泥深牛健犁山靈顧我應大笑活此一方窮
蒸黎

十二月高山見雪桃花盛開詩以紀異

嶺外年光異物華寒威淑氣一時加高峰積雪初開霽夾
嶺天桃已放花玉女曉乘丹鳳翼瓊樓晴起赤城霞此中
消息憑誰證付與閒吟手八叉

和樂履安新庵觀插原韻

時余已解豐順任

良足樂勸相竟何功住久今成別還期話歲豐

自邵返豐留謝唐元登兼別同事諸公即用來韻

南風一夜達陷隍回首知交情自芳采及葑菲扶弱植相
期膠漆薄時粧淋漓別酒春生柳霖霖甘霖野秀秧撫字
有心思共濟片帆何事榜人忙

昌黎遺澤在江濱仰止依然萬仞青學製一方慚草創濫
竽兩載辱山靈群公高義勞相助半世虛名笑不經珍重
離亭頻握手醇醪飲我醉難醒

山斗重來鎮列城承流隨地布仁聲鱣波春靜朝曦麗鳳

嶺氛消暮靄橫九邑同風和自洽三年報最政皆成迂疎
念我毫無補不獨臨岐感別情

何處重尋勾漏砂偶來巖邑暫栖家辛勤作堵無虛日寂
寞空山未見花愧子歌詩棠蔽芾繫人懷思柳天斜分襟
剗有冰心質爲耿清溪水一涯

落落高情海上霞期余後會未全賒重吟揭嶺千峯月共
撥山城萬樹花勝賞他年懷繼綫離心此日托幽遐一江
春水留人住漫汲深清獨煮茶

將去豐順留贈汀子上明府

萬壑千巖裏窮簷藉雨膏三農仍罄室兩載愧操刀何幸
循良代群占撫字勞都人應寄語報我樂名郊



